

HOWELL, DAVID ('Llawdden '; 1831 - 1903);

Enw: David Howell
Ffugenw: Llawdden
Dyddiad geni: 1831
Dyddiad marw: 1903
Rhiant: John Howell
Rhyw: Gwryw
Maes gweithgaredd: Crefydd; Barddoniaeth
Awdur: David Gwenallt Jones

Ganwyd 16 Awst 1831, yn Nhreoes, plwyf Llan-gan, Bro Morgannwg, yn fab i JOHN HOWELL (bu farw 1880), ffermwr, a blaenor gyda'r Methodistiaid Calfnaid, a symudodd o Dreoes i Fryncwytyn, fferm yn ymyl Pencoed, lle y bu ei fab yn ffermio gydag ef. Gwelodd [John Griffiths](#), rheithor S. Mary Hill, ei fod yn fachgen peniog, a pherswadiodd ef i fyned i 'Eagle School' y Bont-faen; oddi yno aeth i'r ysgol baratoi ym Merthyr, ac oddi yno i sefydliad esgobaethol Llandaf yn Abergafenni. Ordeiniwyd ef yn 1855 yn ddiakon gan esgob Llandaf ac yn offeiriad yn 1856. Rhwng 1855 ac 1859 bu'n gurad yng Nghastellnedd tan yr [archddiacon Griffiths](#), a rhwng 1857 ac 1861 yn ysgrifennydd Cymdeithas Cynorthwy Offeiriaid yr Eglwys. Gwnaed ef yn ficer Pwllheli yn 1861, ac yn 1864 yn ficer eglwys S. Ioan, Caerdydd; gadawodd Gaerdydd yn 1875 a mynd yn ficer Wrecsam, sir Ddinbych, lle y bu tan 1891, a symud wedyn i ficeriaeth gyfagos Gresford. Yn 1877 cafodd radd B.D. gan archesgob Caergaint; yn 1885 gwnaed ef yn brebendari Garth Felyd, ac yn ganon anrhydeddus Llanelwy, ac yn 1889 gwnaed ef yn archddiacon Wrecsam. Yn 1897 penodwyd ef yn ddeon Tyddewi.

Lluniodd 'Llawdden' englynion a cherddi ym more ei oes; yr oedd ei dad, John Howell, yn gydolygydd *Y Cylchgrawn* o 1851 i 1855, ac yn fardd, a chyhoeddwyd casgliad o'i gerddi: *Colofn y Bardd: Sef Awdlau, Cywyddau, Ac Englynion, Ar Wahanol Destynau, Moesol A Chrefyddol, Gan John Howell, Pencoed, Morganwg*, 1879. Bu 'Llawdden' hefyd yn darlithio ar bynciau fel 'Emynyddiaeth Gymreig' a '[Dewi Sant](#),' ac yr oedd yn enwog fel areithiwr huawdl ar lwyfan yr eisteddfod genedlaethol. Cyhoeddodd y llyfrynnau hyn: *Foreign missions, their progress during the reign of Queen Victoria ...* 1879; *Welsh Nationality: an address delivered ... before the 'Welsh National Society of Liverpool' ... Dec. 1st 1901*, 1902; a chyhoeddodd erthyglau yn *Y Cyfaill Eglwysig* a chylchgronau eraill. Eglwyswr efengylaidd Cymreig ydoedd. Bu farw yn Nhyddewi, 15 Ionawr 1903, ac y mae yn yr eglwys gadeiriol dabled goffa iddo.

Awdur

David Gwenallt Jones, (1899 - 1968)

Ffynonellau

Y Geninen, 1903

J. Vyrnwy Morgan, *Welsh Religious Leaders in the Victorian Era* (Llundain 1905)

Am John Howell, gweler *Rhestr gyda nodiadau byrion, o Enwogion Cymreig o 1700 i 1900* (1908) a'r cyfeiriadau

Dolenni Ychwanegol

VIAF: [4426211](#)

Wikidata: [Q16030806](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

